

VENDIM
Nr. 51, datë 1.10.2014

PLANI I NDIHMËS SHTETËRORE “PËR KRIJIMIN E FONDIT NË MBËSHTETJE TË GRAVE SIPËRMARRËSE”

Komisioni i Ndihmës Shtetërore, me pjesë-marrjen e:

Arben Ahmetaj	kryetar
Mimoza Dhëmbi	anëtare
Edmond Ademi	anëtar

Ahmet Maçellari	anëtar
Anduena Dedja	anëtare,

në mbledhjen e tij të datës 1/10/2014, shqyrtoi raportin për planin e dhënies së ndihmës shtetërore “Për krijimin e Fondit në Mbështetje të Grave Sipërmarrëse”. Njoftimi i skemës është bërë pranë Drejtorisë së Tregut të Brendshëm nga Drejtoria e Mbështetjes së Sipërmarrjes në Ministrinë e Zhvillimit Ekonomik, Tregtisë dhe Sipërmarrjes me shkresën nr. 4808/4, datë 9.7.2014 dhe është regjistruar në Regjistrin me nr. Al/N/17/2014.

OBJEKTIVI I SKEMËS SË NDIHMËS: Skema lehtëson veprimtarinë ekonomike të ndërmarrjeve që drejtohen nga gratë, duke ndikuar në përmirësimin e klimës dhe kushteve operuese të sipërmarrjes femërore, dhe kontribuar në zhvillimin ekonomik të vendit.

BAZA LIGJORE E SKEMËS: Projektvendimi i Këshillit të Ministrave “Për krijimin e Fondit në Mbështetje të Grave Sipërmarrëse”, i iniciuar nga Ministri i Zhvillimit Ekonomik, Tregtisë dhe Sipërmarrjes.

Komisioni i Ndihmës Shtetërore, pasi shqyrtoi raportin e përgatitur nga Drejtoria e Tregut të Brendshëm dhe gjithë dokumentacionin mbështetës,

VËREN SE:

1. Përfitues të ndihmës janë ndërmarrjet mikro, të vogla dhe të mesme të cilat drejtohen nga gratë.
2. Ndihma do të jepet ndërmarrjeve që ushtrojnë veprimtari ekonomike në sektorët prodhues dhe të shërbimit, në industrinë e përpunimit aktiv (fason), në sektorin e turizmit, në fushën e kërkimit dhe të zhvillimit, në procesin e agropërpunimit, në fushën e dizenjimit, modelimit, artizanatit.
3. Ndihma do të jepet në formën e pagesës së interesave për kreditë e marra nga gratë dhe që do të përdoren për investime në biznes. Vlera gjithsej e ndihmës është 26 500 000 lekë. Për një ndërmarrje, skema do të mbulojë 50 % të normës së interesit, për 4 vite radhazi dhe jo më shumë se 1 000 000 lekë për një kredi.
4. Skema e njoftuar do të fillojë të zbatohet në vitin 2014, dhe do të zgjasë 4 vite.
5. Dhënës i ndihmës është Drejtoria e Mbështetjes së Sipërmarrjes në Ministrinë e Zhvillimit Ekonomik, Tregtisë dhe Sipërmarrjes (MZHETS), ndërsa autoriteti përgjegjës për zbatimin dhe monitorimin e kësaj mase do të jetë Agjencia Shqiptare e Zhvillimit të Investimeve (AIDA).
6. Në kuptim të nenit 4 të ligjit për ndihmën shtetërore, skema e njoftuar përbën ndihmë shtetërore, duke qenë se:
 - Ndihma jepet nga autoritete publike, përmes burimeve shtetërore në kuptim të nenit 4, pika 1 të ligjit nr. 9374 datë 21.4.2005 “Për ndihmën shtetërore” të ndryshuar.
 - Skema ndikon në mbulimin e gjysmës së kostos së huamarrjes, duke i dhënë një avantazh, i cili mund të ndikojë ose të kërcënojë të dëmtojë konkurrencën.
 - Skema është selektive, sepse ndihma jepet për një numër të kufizuar ndërmarrjesh.
 - Skema lidhet me sektorë dhe ndërmarrje, të cilat janë aktive në tregtinë me shtetet e rajonit.
7. Skema e ndihmës e njoftuar është në përputhje me nenin 13, pika 3 “Ndihma shtetërore që mund

të lejohet” të ligjit të ndihmës shtetërore, ku nëpërmjet subvencionit të huave për kryerjen e investimeve nga ndërmarrjet do të kontribuojë në zhvillimin e veprimtarive të caktuara ekonomike ose zhvillimin e zonave të caktuara ekonomike, deri në atë masë sa kjo ndihmë nuk është në kundërshtim me detyrimet e marrëveshjeve ndërkombëtare të ratifikuara nga Republika e Shqipërisë.

PËR KËTO ARSYE,

Komisioni i Ndihmës Shtetërore, në bazë të neneve 13, pika 3, 22, pika 2, 30 dhe 31 të ligjit nr. 9374, datë 21.04.2005 “Për ndihmën shtetërore”, të ndryshuar,

VENDOSI:

1. Të miratojë skemën e njoftuar të ndihmës shtetërore “Për krijimin e Fondit në Mbështetje të Grave Sipërmarrëse”.
2. AIDA, brenda datës 31 mars të çdo viti, të paraqesë raport për impaktin e ndihmës shtetërore gjatë vitit paraardhës financiar.
3. Të japë çdo informacion që do të kërkohet për monitorimin dhe kontrollin e ndihmës së dhënë.
4. Të ruajë të gjitha të dhënat për zbatimin e skemës deri në dhjetë vjet, pasi ndihma e fundit individuale të jetë dhënë në kuadër të kësaj skeme.
5. Ky vendim hyn në fuqi menjëherë.

KRYETARI
Arben Ahmetaj